



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

Komunikadu Imprensa  
09 Juñu 2014

**Komunidade Maubisse azije JSMP Kontinua hala'o treinamentu kona-ba demokrasia, kna'ar órgaun soberanu no prosesu halo lei**

Iha loron 5 Juñu 2014, Unidade Programa Observasaun Parlamentár (POP), JSMP kontinua hala'o treinamentu kona-ba demokrasia no prosesu halo lei iha Timor Leste. ba komunidade sira iha Suku Maubisse, Distritu Ainaro.

Treinamentu ne'e ho objetivu atu kontinua fahe informasaun hodi ajuda hasa'e komunidade sira ih area rural sira nia koñesimentu kona-ba lalaok demokrasia iha ita nia rain, kna'ar órgaun soberanu sira no oinsá komunidade sira bele partisipa ativa liu-tan iha prosesu halo lei.

Treinamentu ne'e partisipa hosi estrutura suku, representante feto, representante estudante representante komunidade ne'ebe kompostu hosi feto na'in 1 no mane na'in 29.

"Atividade treinamentu ne'e hanesan atividade kontinuasaun husi JSMP durante ne'e hodi hasa'e koñesimentu konselhu suku no komunidade sira atu bele intende di'ak liu tan sistema prinsipiu jeral sira kona-ba demokrasia ne'ebé eziste iha ita nia rain, nune'e bele enkoraza liu-tan sira nia partisipasaun iha prosesu halo lei hodi haburas sistema demokrasia iha Timor Leste," dehan Diretór Ezekutivu JSMP, Luis de Oliveira Sampaio.

Xefi Suku Maubisse, Sr. Filomeno Maria Mendonça agredese tebes ba JSMP tanbá bele habelar ona informasaun ne'e ba komunidade iha sira nia suku, no rekomenda ba JSMP atu kontinua fasilita treinamentu hanesan iha futuru ho tempu ne'ebé adekuaudu liu-tan.

Durante treinamentu, partisipante sira kestiona makas liu-ba kondisaun infraestruturá iha sira nia suku inklui falta be-moos ne'ebé kontinua infrenta desde primeiru governu mai to'o agora. Partisipante sira konsidera situasaun ida ne'e nu'udar injustisa bo'ot ba sira bainhira kompara ho prevelejiu ne'ebé eis titular sira hetan husi Pensaun Vitalisia. Iha parte seluk, partisipante sira mós husu ba JSMP bele rekomenda ba Parlamentu Nasional hodi bele tau matan mós ba sira nia suku ne'ebé iha potenciais makas ba ekenomia no turismu, maibé ladu'un hetan konsiderasaun husi estadu.

Tuir planu kontinuasaun husi atividade treinamentu ne'e sei realiza iha distritu Oe-Cusse no treinamentu ne'e realiza tamba hetan apoiu husi UNDEF.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)